

ZAKON

O FEDERALNIM UPRAVNIM PRISTOJBAMA I TARIFI FEDERALNIH UPRAVNIH PRISTOJBI

I - OPĆE ODREDBE

Član 1.

Ovim zakonom uređuje se plaćanje upravnih pristojbi (u daljnjem tekstu: pristojba), za spise i radnje kod federalnih organa uprave i drugih pravnih lica kojima je povjereno da samostalno rješavaju u upravnim stvarima o određenim pravima i obavezama te kod pravnih lica kojima su povjerena javna ovlaštenja. Ovim zakonom i Tarifom upravnih pristojbi (u daljnjem tekstu: tarifa), koja je sastavni dio ovog zakona uređuje se oblast pristojbi Federacije Bosne i Hercegovine (u daljnjem tekstu: Federacija).

1. PRISTOJBENI OBVEZNIK

Član 2.

1. Pristojbeni obveznik je osoba na čiji se zahtjev pokreće postupak, odnosno obavljaju radnje za koje je u Tarifi propisano plaćanje pristojbe.
2. Ako za isti spis ili radnju postoji dva ili više pristojbenih obveznika, njihova je obaveza solidarna.
3. Ako više osoba podnosi zajednički zahtjev, plaća se jedna pristojba.

2. PRISTOJBENA OBAVEZA

Član 3.

1. Pristojbena obaveza nastaje u trenutku predaje zahtjeva za izdavanje rješenja ili druge isprave, odnosno u trenutku podnošenja podneska.
2. Upravna pristojba se ne može naplatiti ako nije utvrđena Tarifa upravnih pristojbi.

Član 4.

1. Pristojbe se plaćaju u trenutku nastanka pristojbene obaveze, ako za pojedine slučajeve nije propisano drukčije.
2. Pristojbena obaveza nastaje:
 - za rješenja i druge isprave u trenutku podnošenja zahtjeva za njihovo izdavanje;
 - za podneske u trenutku kada se predaje a usmeno saopštenje daje u zapisnik kada se zapisnik sastavlja;
 - za pravne radnje u trenutku podnošenja zahtjeva za izvršavanje tih radnji.

3. PRISTOJBENA OSNOVICA

Član 5.

1. Ako je Tarifom propisano da se pristojba plaća prema vrijednosti predmeta, kao osnovica za utvrđivanje pristojbe uzima se vrijednost naznačena u podnesku ili ispravi ili vrijednost utvrđena na način propisan u tarifi ili vrijednost utvrđena procjenom organa koji vodi postupak.
2. Kada se isprava za koju se plaća taksa, na zahtjev stranke, izdaje u dva ili više primjeraka, za drugi i svaki daljnji primjerak plaća se taksa kao za prepis i ovjeru prepisa.
3. Taksa iz stava 2. ovog člana ne može biti veća od takse za prvi primjerak.

II - PRIPADNOST PRIHODA OD PRISTOJBI

Član 6.

Prihod ostvaren od federalnih pristojbi prihod je budžeta Federacije.

III-OSLOBAĐANJE OD PLAĆANJA PRISTOJBI

1. OPĆA OSLOBAĐANJA

Član 7.

Od plaćanja općih pristojbi tar. br. 1-6 oslobođeni su:

1. Tijela federalne vlasti;
2. Pravna lica kada rješavaju po zahtjevima u okviru povjerenih javnih ovlaštenja;
3. Ustanove iz oblasti odgoja i obrazovanja, prosvjete, znanosti, kulture, informiranja, zaštite kulturne i privredne baštine, zdravstva, veterinarstva, socijalne zaštite i humanitarne i dobrotvorne organizacije u obavljanju svoje djelatnosti;
4. Učenici i studenti za vrijeme redovnog školovanja;
5. Organizacije i savezi osnovani za zaštitu lica sa fizičkim i psihičkim nedostacima i poremećajima za spise i radnje u vezi sa vršenjem djelatnosti, savezi i organizacije ratnih vojnih invalida, porodice šehida i poginulih boraca, demobilisanih boraca za spise i radnje u vezi sa vršenjem djelatnosti;
6. Građani slabog imovnog stanja na osnovu potvrde centra za socijalni rad;
7. Vojni invalidi;
8. Lica kojima je rješenjem nadležnog organa priznato svojstvo člana porodice poginulih, umrlih, nestalih i zarobljenih boraca;
9. Nezaposlene izbjeglice i raseljena lica;
10. Penzioneri koji ostvaruju pravo na zaštitni dodatak.

2. PREDMETNA OSLOBAĐANJA

Član 8.

Pristojbe se ne plaćaju na slijedeće spise i radnje:

1. Predstavke i pritužbe te prijedloge federalnim i drugim javnim tijelima;
2. Molbe za pomilovanja i rješenja o tim molbama;
3. Zahtjev za naknadu štete osoba neopravdano osuđenih i neosnovano lišenih slobode te rješenja o tim predmetima;
4. Spise i radnje u postupku pribavljanja dokaza o siromaš nom imovinskom stanju radi oslobađanja od plaćanja pristojbi;
5. Spise i radnje u postupku za povrat više plaćenih obaveza;
6. Spise i radnje u postupku za ispravljanje grešaka u rješenjima, ispravama i službenim zapisnicima;
7. Spise i radnje u postupku sastavljanja i ispravljanja popisa birača;
8. Spise i radnje u postupku usvajanja i postavljanja staratelja;
9. Sve prijave i prijedloge za utvrđivanje poreza i pristojbi te za korištenje poreskih oslobađanja i olakšica;
10. Spise i radnje u postupku vraćanja, odnosno ostvarivanja prava naknade za oduzetu imovinu;
11. Sve spise i radnje za ostvarivanje prava iz mirovinskog, invalidskog i zdravstvenog osiguranja te oblast boračkoinvalidske zaštite i socijalne zaštite;
12. Spise i radnje u vezi sa redovnim školovanjem učenika i studenata osim pristojbi za svjedodžbu po završenom školovanju ili diplomu;
13. Spise i radnje u vezi sa zasnivanjem radnog odnosa i ostvarivanjem prava iz radnog odnosa;
14. Spise i radnje lica privremeno nezaposlenih kada ostvaruju prava iz osnova materijalnog osiguranja;
15. Spise i radnje u vezi sa primanjem poklon- paketa i darova od dobrotvornih humanitarnih organizacija iz inostranstva;
16. Spise i radnje u vezi sa uređivanjem prava i dužnosti iz djelokruga odbrane;
17. Spise i radnje u vezi sa zaštitom spomenika kulture i prirode;
18. Podneske upućene tijelima za predstavke i pritužbe federalnim tijelima;
19. Spise i radnje u postupku za sahranu umrlih lica;
20. Spise i radnje u postupku za ostvarivanje prava na doplatak na djecu;
21. Prijave i odjave prebivališta osoba, boravišta i adrese stanovanja osoba;
22. Spise i radnje u vezi sa uvozom roba i usluga po osnovu donacija, programa i projekata rekonstrukcije i obnove Federacije;
23. Spise i radnje, pojedinih pravnih lica kod rješavanja u upravnim stvarima u okviru povjerenih javnih ovlaštenja.

Član 9.

Strani državljani su oslobođeni pristojbi na spise i radnje po principu uzajamnosti.

IV - POVRAT PRISTOJBE

Član 10.

1. Osoba koja plati pristojbu koju nije bila obavezna platiti ili je plati u većem iznosu od propisanog ili plati za radnju koju tijelo nije obavilo ima pravo na povrat plaćene ili više plaćene pristojbe.
2. Postupak za povrat pristojbe pokreće se na zahtjev stranke.
3. Zahtjev za povrat pristojbe rješava tijelo za čiji je rad plaćena pristojba.
4. Zahtjev za povrat pristojbi od pravnih lica s javnim ovlaštenjima rješava ispostava Porezne uprave Federalnog ministarstva finansija (u daljnjem tekstu: Porezna uprava) prema sjedištu pravnog lica s javnim ovlaštenjima.

V - PRISILNA NAPLATA PRISTOJBE

Član 11.

Ako je radnja za koju je nadležno tijelo moralo naplatiti pristojbu obavljena, a pristojba nije plaćena od pristojbenog obveznika, pristojba će se naplatiti prisilno prema odredbama o prisilnoj naplati poreza od pravnih lica i građana.

VI - ZASTARJEVANJE

Član 12.

1. Pravo na naplatu pristojbe zastarjeva za dvije godine nakon isteka godine u kojoj je pristojbu trebalo naplatiti, a pravo na povrat pristojbe zastarijeva za dvije godine nakon isteka godine u kojoj je pristojba plaćena.
2. Vrijeme zastarjevanja prava na naplatu pristojbe prekida se svakom službenom radnjom nadležnog tijela izvršenom radi naplate koja je stavljena do znanja pristojbenom obvezniku.
3. Vrijeme zastarijevanja prava na povrat pristojbe prekida se svakom radnjom pristojbenog obveznika poduzetom kod nadležnog tijela radi povrata pristojbe.
4. U svakom slučaju zastarijevanje nastupa nakon isteka pet godina od dana nastanka obaveze.

VII - NADZOR

Član 13.

1. Naplatu pristojbe vrši tijelo koje rješava spise i obavlja radnje za koje se plaća pristojba.
2. Nadzor nad primjenom ovog zakona vrši Federalno ministarstvo finansija (u daljnjem tekstu: Ministarstvo).

VIII - PLAĆANJE PRISTOJBI

Član 14.

1. Pristojbe se plaćaju u federalnim biljezima.
2. Naplatu pristojbi vrši tijelo koje rješava zahtjeve ili preduzima radnje
3. Izuzetno od stava 1. ovog člana, pristojba se uplaćuje direktno na propisani račun:
 - ako pristojba iznosi više od 30 KM,
 - ako je propisano da se pristojba uplaćuje direktno na propisani račun bez obzira na iznos pristojbe.

Član 15.

1. U rješenju ili drugoj ispravi za koju je plaćena pristojba naznačuje se da je pristojba plaćena; u kojem iznosu, na koji način i prema kojem tarifnom broju.
2. Poništavanje federalnih biljega, koji se lijepe na podnesak, obavlja tijelo nadležno za prijem podneska, a u ostalim slučajevima tijelo koje donosi ili uručuje stranci rješenje ili drugu ispravu za koju se plaća pristojba
3. Federalni biljezi poništavaju se štambiljom ili na drugi odgovarajući način.
4. U ispravama koje se izdaju bez pristojbe, mora se naznačiti na osnovu kojih su odredbi ovog zakona i drugih propisa oslobođene od plaćanja pristojbe.

IX - OVLAŠTI U PROVEDBI ZAKONA

Član 16.

Ovlašćuje se federalni ministar finansija da donese pravilnik kojim će se urediti: izdavanje, rasparčavanje, povlačenje iz upotrebe i zamjena federalnih biljega.

Član 17.

1. Ovlaštenja za maloprodaju federalnih biljega ostalim pravnim i fizičkim licima izdaje federalni ministar finansija.
2. Federalni ministar finansija određuje visinu provizije koja pripada prodavaču federalnih biljega.

X - PRIJELAZNE I ZAVRŠNE ODREDBE

Član 18.

Danom stupanja na snagu ovog zakona prestaju se primjenjivati na teritoriji Federacije propisi koji su od tog dana uređivali oblast upravnih pristojbi.

Član 19.

Za spise i radnje za koje je pristojbena obaveza nastala do dana stupanja na snagu ovog zakona naplatit će se pristojba koja je bila propisana u trenutku nastajanja pristojbene obaveze.

Član 20.

Do izdavanja i raspoređivanja federalnih biljega pristojbe se plaćaju izravno na propisani račun.

Član 21.

Do puštanja u opticaj KM, pristojbe iskazane u Tarifi mogu se plaćati u DEM ili protuvrijednosti valuta koje se koriste u platnom prometu Federacije po srednjem tečaju koji utvrđuje i objavljuje nadležna finansijska institucija na dan plaćanja.

Član 22.

Ovaj zakon stupa na snagu osmog dana od dana objavljivanja u "Službenim novinama Federacije BiH".

Predsjedavajući Doma naroda **Mariofil Ljubić**, s. r.
Predsjedavajući Predstavničkog doma **Enver Kreso**, s. r.